

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839      O LE SULU SAMOA      TESEMA 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

**TUUMALO AFIOGA SUI TAITAIFONO**  
**FONO TELE, EFKS.**



# FAASINO UPU

1 O LE LAUGA	2
2 OSIGA FEAGAIGAEFKS MUTIATELE	3
3 TUUMALO SUI TAITAIFONO	4
4 POUTASI I LE SATAURO O KERISO	6
5 MAE'A GALUEGA TETELE EKALESIA	6
6 FEAU O LE ASO I LUGA O UPEGA	7
7 KERISIMASI I LOU AIGA	7
8 MEAALOFA KERISIMASI	7
9 O LE PEROFETA MULIMULI	8
10 NA O AFIOGA TULEI MAI FOFOGA	12
11 O E UA MALILIU	14
12ATA O MATAUPU TUSIA	16

## O LE LAUGA

Tusi Faitau: Mataio 1: 18 – 25,

Matua: Mataio 1: 23, “Faauta, e to le taupou, ma fanau mai le tama tane, latou te faaigoa foi ia te ia o Emanuelu; o lona uiga pe a faamatalaina, Ua ia te i tatou le Atua.”

Manatu Autū: O le Atua ua ia i tatou, i o tatou tuaoi ma ona tua atu (Aso Sa, 25 Tesema 2022).

Ua tatou aulia manuia le Kerisimasi, ona o le alofa ma le tausiga agalelei a lo tatou Atua. Ua asiasi mai ma ua tatou mafuta fiafia ma nisi o aiga ma uo, sa tatou nonofo valavala, e le gata i Samoa nei lava, a o i latou sa aumau i atunu mamao. Ua tatou fesilafai, ua lagona le mafanafana ma le olioli, ina ua mafuta faatasi. E lē tāua tele poo a ni mea na aumai, pei o tupe ma faaoso, o taumafa ma oloa eseese. A o le itu e sili ona matagofie, o le lagona o le mafanafana o le pa’i atu e faatalofa, fusi atu ma opo mai, o aiga ma uo pele ua ia i tatou. Ua i ai auala o fesootaiga tele vavave i nei ona po, i le telefoni ma komepiuta, o fesootaiga i luga o upega tafailagi, ua faigofie ona faalogo atu, vaavaai atu a o talanoa ma silasila mai aiga i atunu mamao. Peita’i, e lē tusa lava le olioli ma le fiafia o le nonofo vava mamao, ma le nonofo faatasi. E moni ai le Fai Salamo, “Faauta, o le mea e matuā lelei ma le matagofie lava, pe a nonofo faatasi lava o uso.”

O le mafutaga ma fesoota’iga a le Atua ma lona nuu o Israuelu i le Feagaiga Tuai, o se mafutaga sa vava mamao ma valavala. O le Atua i lona afioaga mamalu, e maualuga ma paia i le Lagi, a o Israuelu i le laueleele o Kanana, i le lalolagi nei. Sa le’i vaai tino Israuelu i lo latou Atua, na ona faalogo, ae sa le’i mafai ona

vaai ma pa’i atu ma lagona le mafanafana. O lo latou talitonuga, e fano le tagata e vaai ona mata i le Atua mata’utia. Sa fesooota’i e ala i soo-upu e pei o faamasino, ma ta’ita’i filifilia e i ai Mose ma le au perofeta. Na fa’ali mai le finagalo o le Atua e ala i tulafono, sa fetalai mai e ala i agelu, ma isi auala, a o natia pea ma ufitia le mamalu ma le paia silisili ese o le Atua.

Sa fausia mea faitino, e pei o le atolaau, ma tuu i ai le tootoo o Mose, o papa maa o le tulafono; o mea ia sa ta’ua o faailoga o le Atua e i ai ma lona nuu. Na oo ina fausia le malumalu ma le potu e sili ona paia, tuu i au ma le ato laau, ma tatau ai le ‘ie puipui e vavae ese ai le afioaga o le Atua mai le nofoaga o tagata. A e sa le’i mafai lava ona vaai tino ma militino Israuelu ma le Atua.

Lea la ua oo i le auga tupulaga, e faataunuu ai folafolaga, o valoaga ma perofetaga, faasino i le Atua o le a afio ifo i lalo, i le mea o i ai Lona nuu, e mau faatasi ma ona tagata. Valoaga e pei ona sa vavaloi ai Isaia, o le a to le taupou, ma fanau mai e ia le tama tane, e faaigoa o Emanuelu – o le uiga o lea upu ma le suafa Emanuelu – Ua ia te i tatou le Atua.

Ina ua fa’ali agelu ia Maria ma Iosefa i Nasareta, ina ua to le taupou o Maria mai le Agaga Paia, ma fanau e ia lana tama ulumatua i le falemanu, a o feagai le lalolagi ma le tusiga igoa na faatonu e Kaisara Aokuso o Roma, na molimau ai leoleo mamoe ma le au makoi, na faailoa e le fetu pupula mai sasa’e, i totonu o Peteleema le aai a Tavita. Ua fanau mai Iesu, o Emanuelu, e pei ona sa folafola ma valoia mai le selau ma selau o tausaga. O le Atua sa valavala ma ona tagata, lea ua afio mai, ua ia te i tatou.

E i ai itu tetele, na faasesēina ai Iutaia, i le taunu mai o lo latou Emanuelu. Muamua, sa latou faatalitali, o se Emanuelu e pei o Tavita, o le Mesia fitafita e auai mai na te faaola lona nuu, i le pelu ma le talita, o le solofanua ma le tao, o le malosi ma le paoa faaletino. Talofa e, ua lē ō gatasī le futia ma le umele, i o latou faamoemoega sa nofo tatali ai. E ese le faamamafa, a e lē o le finagalo lea o le Atua mo lana Emanuelu. O lona lua, sa faatalitali Israuelu, i le Emanuelu e afio mai na o i latou lava, Iutaia le nuu filifilia. Le manatu faapito na o ia, faasausili ma faamaualuga, tuu ai pe a le tagata o nuu ese. Ma latou faapumoomoo ai le afio mai o le Emanuelu i lo latou lotoifale. Peita’i, o le Atua e auai mai, mo Israuelu faapea foi ma nuu tuaoi, ma ona tua atu.

O itu foi ia na faasesēina ai le au soo, ina ua fai le galuega a le Emanuelu. Faatasi ai ma le faasesēina, e fai le galuega faaola, i se auala vave, auala faigofie ma taugofie, auala faavavega pei o le ‘emo o le uila. Peita’i, o le auala o puapuagā, o le soifua ofoina atu e pologa, tautua ma osi taulaga, e tauave agasala a le lalolagi, na filifili Keriso e fai ai. E pei ona sa la faatino le galuega faa-Mesia, i lona usita’i i lona Tama i le Lagi, ma maliu tiga ai i le satauro, ae na toe tu manumalo mai le oti ma le tuugamau.

Le Ekalesia pele a Iesu Keriso ma le au faitau Sulu Samoa i lenei Kerisimasi, ua faamanatu mai le feau o le Tala Lelei, i le alofa silisili ese o le Atua, ua lē tu tu mamao ese, a ua matuā afio mai, e ala i lona Alo pele o Iesu, le Pepe o le Kerisimasi, ua militino faatasi ma i tatou tagata agasala. Ua faamanatu mai foi, ia ‘aua le faasesēina i tatou, i le faamamafa o mea faaletino, o fiafiaga ma mea e pala ma mavae, a o le talia o Ia i o tatou loto ma agaga, ma usita’i i lona finagalo paia. Ina ia soia le manatu faapito, faasausili ma faamaualuga, a ia maua le loto maulalo, e nonofo fealofani, e amanaia le isi uso a tuaoi, ma ona tua atu. Ia maua le mafanafana o le militino faatasi, e ala i le pulupululima faatasi, fefaaasoaa’i ma tauamo le galuega a le Atua. O a foi to’atuga o le soifuaga, faafitauli ma puapuaga o feagai ai, o le Emanuelu ua fanau mai i le Kerisimasi, o le Atua ua auai faatasi ma i tatou, i totonu o loto ma agaga, i totonu o aiga ma lo tatou nuu, le Ekalesia ma le lalolagi atoa.

O se faamanatu foi i le auala o tatou faia ai le galuega a le Atua, ma le faatinoga o Lona finagalo i le lalolagi nei. Ina ia atagia ma tino mai ai le Atua militino, le Atua e auai faatasi ma ona tagata. Ina ia moni lona tino mai. O le faifeau ma lana Aulotu, o le matai faasa’osa’o o le aiga ma lona au aiga, o ta’ita’i faalemalu ma o latou tagata nuu, o ofisa sili e pule i le va ma tagata faigaluega. Ina ia mafanafana le fesoottai vavalalata, ina ia tausaafia ma pululima faatasi, i upu ma tala aemaise le faatinoga, ina ia moni le fetalitonua’i e faatuatuaina e le tasi le isi, a e lē ese foliga ataata i le fesaga’i a e toe fai tala e faaleaga ai pe a u mai le tua. Ia fefaaasoaa’i i meaalofa a le Atua, faapea faafitauli e tula’i mai, ma faanoanoaga e afaina ai se itutino. Ina ia avea le militino faatasi o le alofa ma le amiotonu, le olioli ma le filemu, e fanau mai ai faamanuiaga a le Atua mo tatou aiga, o faiga malo ma Lona Ekalesia, e ala i tofiga o ta’ita’i, le soifua faapaiaaina o tagata lautele, ma le soifua faitaulaga o le au faatuatua. Ia manuia le Kerisimasi & Tausaga Fou. Amene. *Saunia e le Faatonu Sulu.*

**TUSI MO LE SUEGA ULUFALE**  
**KOLISI FAAFAIFEAU MALUA**  
**2023**

**FEAGAIGA TUAI: ESEKIELU**

**FEAGAIGA FOU: EVAGELIA A IOANE**

**ASO SU’EGA: 15 & 16 AOKUSO 2023**

**OSIGA FEAGAIGA**  
**EFKS MUTIATELE**

O le Aso Tofi, 22 Tesema na osi ai le Feagaiga a le EFKS Mutiatele, Aleipata ma lo latou faifeau le susuga Falaniko Sio FS ma le faletua ia Teleolealofa. Na ta’ita’i le Toeaina o le Pulega Aleipata, susuga Pati Vili FT, faitau le Tusi Paia e le susuga Vaai Tua FS (Lalomanu), tatalo le susuga Vaituu Palale FS (Satitoa, Failautusi Pulega), a o le susuga Kolia Matamu FS (Ulutogia) na saunia le Lauga. Na molimau le sui o le Aulotu e tusa ma la latou faiga filifiliga, sa fai mea faalogo lava i le fesoasoani musumusu mai o le Agaga e ala i le tofa ma le uta na maua ai la latou faaiuga lelei. Na saunoa le susuga Falaniko i la la’ua filifiliga e talia ai le valaau, ma le loto faafetai i le Atua i le tofiga ma le fa’aaogaina o i la’ua mo Lona galuega. Ua ia folafola foi o le a la’ua faasaga e fai le galuega e tusa ma le finagalo o le Alii, e galulue faatasi ma le Aulotu aemaise le aloaia o fautuaga mai le au matutua o ao sinasina o le afioaga ma le Ekalesia i Mutiatele.

Na faafeiloa’i ma faamanuia i la’ua e le Ta’ita’i o le Sauniga, faapea le afioga Taitafono Komiti Au Toeaina, susuga Asotasi Gu Time FT, Enefatu Lesa FT, Roma Enosa FT, Timoteo Momoemausu FT ma nisi o Toeaina ma sui o le Aulotu. Sa le’i mafai ona auai le Toeaina ma le Pulega Palauli, ona sa tuatuagia i Toe Sauniga o le susuga Mose Tanielu FS ua maliu, i lea taimi. Na taualuga le sauniga i le Talisuaga Paia a le Alii na ta’ita’i e le faafeagaiga filifilia ma le auga o aute o lea aso.

O Falaniko ma Tele na i’u mai Malua i le tausaga 2010, ona galulue lea faa-faiaoga i Kolisi Nuuausalā, Papauta ma Maluafou seia valaauina e tauri nuu. O le susuga Falaniko o se lupe faalele a le EFKS Sili, Matagaluega Faasaleleaga, a o le faletua ia Teleolealofa o se taulaga soifua a le EFKS Moataa, Matagaluega Vaimauga. Ia manuia le galuega.

---

## ***TUUMALO LE AFIOGA SUI TAITAIFONO FONO TELE, SUSUGA ATAPANA IOSEFA UILELEA FT***

*"Amuia e agamalu; aua e fai mo latou tofi le nuu." E, le Lagi e! lo'u Tama o i ai, a valaaui na alu loa!*

E momoe ma manū e lē fati, a e sau mala e ati a'e. Talofa e, ua maliliu toa, ua maumau ai auupega o le taua. A o feagai le lalolagi Kerisiano ma fiafiaga e faailoga le Kerisimasi o le 2022 ma sauni e faafetaia'i le Tausaga Fou 2023, a e faate'ia le EFKS i le tala faanoanoa i le valaa a le Atua i Lana auauna, le Sui Taitaifono o le Fono Tele, le faafeagaiga taulagi a le EFKS Lotofaga, le Toeaina o le Pulega Lepa ma Lotofaga, a o le KMTA/Toeaina Faatonu o le Matagaluega Lotofaga Lepa ma Aleipata, le susuga ia Atapana Iosefa Uilelea FT. Na maliu o ia a o faataotolia i le maota gasegase o Middlemore i Niu Sila, sa togafitia ai o ia i le gasegase o fatuga'o, peita'i ane na iloa ai sa maua i le kanesa. Sa pei lava o le oo ane i le tupu o Tavita, o le tala i le maliu o le tupu o Saulo ma le uo pele ia Ionatana, le oo mai o le tala faanoanoa i le mamalu o le EFKS a o tapua'i a le sailiga fofo a le Toeaina.

Na faia lona ulua'i sauniga i le malumalu Mauga o le Alii, EFKS Panmure, Pulega Maungakiekie Aukilani sa ta'ita'i e le susuga Pouniu Faamausili FT, na auai ma molimaui na e le toatele o le aufaigaluega ma tagata lotu o le EFKS i lena itu. Na momoli mai o ia i Samoa nei e le susuga Toeaina Faamausili ma nisi o le aufaigaluega, faatasi ma le faletua ia Teki, le fanau ma le mamalu o le aiga; na taunu i Paleolo i le Aso Sa 1 Januari 2023, ma faia ai le sauniga puupuu e faafeiloa'i ai, na ta'ita'iina e le afioga i le Taitaifono Fono Tele, susuga Tunumoso Soliola Iosia FT, a o le Ofisa Tutotonu na lagiina viiga o le Atua.

Ona momoli atu lea o lona sa i le Laumua o le Ekalesia i Malua, mo le sauniga a le Ekalesia Aoao sa faia i le Pale Iupeli. Na ta'ita'i le afioga i le Taitaifono Fono Tele, Tunumoso Soliola Iosia FT ma fai le Lauga, o le Tusi Paia na faitauina e le afioga i le Teutupe a le Ekalesia, susuga Melepone Isara FS, a o talosaga na ta'ita'iina e le Failautusi Aoao, susuga Vavatau Taufao FS. O pese ma viiga na lagiina e le Kolisi Faafaifeau Malua. Na mae'a le sauniga ona alo lea i le Toona'i o le Aso Sa ma le Tausaga Fou na sauniga e le Laumua i Malua, a o pesepese pea le Ofisa Tutotonu ma leoleo le sa o le Sui Taitaifono. Mulimuli ane ona momoli atu lea o lona tino maliu i le fagaena o Ligaliga e mapu ai a o faatali ona toe sauniga.

O le po o le Aso Lulu 4 Januari 2023 na faia ai le sauniga faaleaiga, na ta'ita'i e le susuga i le Toeaina o Faauuga Siitia, a o le susuga i le faifeau o Siitia Siitia na faitauina le Tusi Paia ma talosaga, o i la'ua o tausoga o le susuga i le Toeaina, o loo galulue i le Ekalesia PIC i Niu Sila . Na molimau ai le toatele o sui o aiga, ma nisi o le aufaigaluega; na ou molimau ai e fai ma sui o le Vasega 1988, sa matou nonofo faatasi ai i le maota o le Pulega Lepa ma Lotofaga i le 1987-1988. O le itula 2.00 i le aoauli o le Aso Tofi 5 Januari 2023 na faia ai le sauniga e le Pulega Lepa ma Lotofaga e aveeseina atu ai lona tino maliu. Na ta'ita'i Susuga Alesana FS ma fai le Upu faala'e'i'au, a o le susuga Dr. Tavita Maliko FS na saunia le Tatalo. Ona momoli atu lea o lona sa i lona nuu ma lana Aulotu i Lotofaga. Na taunu ma ulufale i le malumalu mo le sauniga lotu na saunia e le Matagaluega Lotofaga Lepa Aleipata, na ta'ita'i e le susuga Pati Vili FT, tatalo Vaituu Palale FS, a o le Lauga na saunia e le susuga Faasalafa Alaovae FT, ua avea nei ma Toeaina o le Pulega e sui ia Iosefa Uilelea. Na tuumuli le mamalu o le faapotopotoga, ona alo ane lea o le afioaga o le Sa'o Faapito ma le Aiga Salevalasi, i la'ua na Aliimau o Faleupolu ma le Faleatua, susu Sitagata ma le Aiga Sa Siatagata, i le sauniga lotu faapitoa a le nuu atoa i lotu ma tapuaiga eseese o i ai. Na ta'ita'i lea sauniga e le susuga Vaigafa Paleono FS, molimau nisi o faauluuluga o le afioaga e i ai Tupuola Oloialii Koki, Lemauga Fiso Faamotu TT (Tiakono Toeaina LLA) i le sao taua o le Toeaina i le faa-Tala Leleiina o le nuu, ua 34 tausaga talu ona osia le latou feagaiga. Na mae'a lea sauniga, ona alo loa lea o le aufaigaluega ma le nofo a Aufaipese a le nuu, le Pulega ma le Matagaluega, tainane afioaga o le Toeaina, i leoleoga ma faamafanafanaga o le po.

O le itula 10 i le taeao o le Aso Faraile 6 Januari 2023 na faia ai lona toe sauniga i le malumalu o lana Aulotu i Lotofaga. Na ta'ita'i le susuga Tunumoso Soliola Iosia FT le Taitaifono Fono Tele, faaulufale atu le sa o le Toeaina e le susuga Pati Vili FT, faiatou le Tusi Paia e le susuga Amuia Seuala FT, tatalo le susuga Pouniu Faamausili FT, lauga le susuga Asotasi Gu Time FT le Taitaifono Komiti Au Toeaina. Sa auai le mamalu o le Malo, le afioga i le Ao mamalu o le Malo ma lana masiofo, le Fono Sui Tofia ma lona faletua, le Sui Palemia le Kapaneta, le Taitai o le Itu

Agai ma Faipule o le Palemene. Na auai foi le sui o le Palemene Niu Sila, tainane le faigamalo a Tutuila ma Manu'a. O le FES ma faauluuluga o Ekalesia, aemaise le EFKS i le Komiti Au Toeaina, le aufaigaluega faifeau ma faletua, o Mafutaga Tina, o matua penisione ma le loaloa o le Ekalesia, o le paia o aiga ma uo ma aumea mamae a le Toeaina, o le Faletua ia Tekimatang ma le nofo-a-alo, o le afioga i le Sa'o Faapito ia Hon. Fiame Naomi le Tamaita'i Palemia, le nuu ma le EFKS Lotofaga sa auai e molimau ma faamavae atu i le susuga i le Toeaina. Na molimau le afioga i le faletua ia Teki e tusa ma la latou mafutaga i totonu o le aiga faapea le la'ua feagai ai ma le galuega a le Atua. O le afioga Hon. Fiame Naomi na molimau o le sui o le Aulotu, o le susuga Leaso Tupa'i FT na molimau o le Komiti Au Toeaina, susuga Faasalafa Alaovae FT na molimau o le sui o le Pulega ma le Matagaluega, a o Tunumoso Iosia FT na molimau mo le Ekalesia Aoao ma la la'ua mafutaga faa-Taitaifono Fono Tele. Na molimaunina ai se ta'ita'i agamalu ma loto maulalo, e filemu ma aga fiafia i lona soifua ta'ita'i ma lana tautua, a o le va lelei feagai ma fesoota'i ma isi tagata. E le se ta'ita'i e si'i soo, a o lana tofa mamao ma le utaga loloto sa maua ai faai'uga lelei mo le sa folau o le Ekalesia, o lana Aulotu ma lona aiga.

A e i ai foi ana aga ma metotia malie, e tusa o le molimau a le Taitaifono Fono Tele ma le Failautusi Au Toeaina. Po o le a se mataupu faigata e fefulisa'i faa-la'au mamafa, e gugu faa-Sakaria o ia ma lana 'ata'ata, ma e i'u ina sologa malie atu ai lena mataupu - e talitonu o ia i le Agaga Paia e fegaoioia'i i le tofa saili fefaaasoaa'i, a siliga tali i seu se finagalo o le tagata, e aumai lava e le Atua le tali talafeagai. O ia sa feagai tonu ma taimi o le sousou o upufai faalemalu, o fesuaiga o faiga-malo i le palota 2019, ua tula'i mai ai le Faigamalo, o ta'ita'iina e le tamaita'i tiakono o lana Aulotu, le afioga i le Sa'o Faapito. Na ia ta'ita'i le sauniga lotu faapitoa lauiloa i le Fale'ie, na tatala aloaia ai le Palemene lona 17, ma le faatautoina o sui mamalu o le Palemene. Na faai'u ona toe sauniga i lona oliolisaga tumau, o loo lagomau i luma maota o le malumalu i Lotofaga Mulifusi ma Tanumaleu sa la'ua galulue ai.

#### **Tala'aga, tofiga ma lona soifua tautua:**

Aso soifua - Aso Lulu, 18 Tesema 1957,

Maliu - Aso Gafua, 26 Tesema 2022

Ua atoa ai le 65 tausaga, ma le 9 aso o lona soifua. O ona tua'a: Tama - Uilelea Uilelea FS (Laulii, Fusi Safata. Sa avea ma Sui Taitaifono Fono Tele 1990);

Tina - Lalagoafaatasi Fuimaono Uilelea (Salani, Salesatele Falealili).

Na fanau o ia i Vailuutai, a o faifeau tausi nuu ai ona tua'a ia Uilelea ma Lalago. O lona suafa muamua o Atapana, a ua lauiloa i lona suafa lona lua o Iosefa, e faamanatu ai lona uso e matua ua malii. E to'a 14 i latou, o ona tuafafine e aofia ai Nuuausala Luulau Gafa ma Ruta Saniva Ng Shiu, o faletua o faifeau ua maliliu. Na a'oa'oina i le Kolisi o Sanele (Chanel College). Sa galue i le Matagaluega Fanua ma Fuagafanua (Dept. Lands and Survey). O se tasi o ana malaga i luga o le galuega, ma taaloga lakapi i Solomona, na la'ua feiloa'i ai ma lana manamea ia Tekimatang.

23 Tesema 1980 - Faaipoipo ma Teki. E to'a 8 o la'ua alo, aofia ai le faletua o le faifeau faiaoga Kolisi Malua, Pu'emalo Tekina (ua malii).

1985 - 1988 - A'otauina Kolisi Faafafae Malua.

21 Aperila 1989 - Osi Feagaiga ma EFKS Lotofaga, (ua 33 tausaga, 8 masina, 6 aso ina ua tatala e le oti) 1995 - Komiti Feau Eseese, Mtg Falealili.

1996 - Vaeluaina le Mtg Falealili, ia Falealili Sisifo & Falealili Sasa'e. Na fa'aauau lona Komiti Feau Eseese, i le Mtg Falealili Sasa'e.

Failautusi Pulega Lepa ma Lotofaga

Failautusi Matagaluega Falealili Sasa'e.

2012 - suia le igoa Mtg, ia Lotofaga Lepa Aleipata 2014 - Toeaina Pulega Lepa & Lotofaga.

2014 - Toeaina Faatonu Mtg Lotofaga Lepa Aleipata

2017 - Failautusi Komiti Au Toeaina

2019 - 2020: Sui Taitaifono Fono Tele

2021 - Taitaifono Fono Tele

2022 - Toe filifilia Sui Taitaifono Fono Tele.

Na ta'ua e le Failautusi Komiti Au Toeaina, o Atapana Iosefa se tasi o Toeaina sa vave tele ona faaeaina i tofiga tetele o le Ekalesia. E le'i atoa se vaiaso na avea ai ma Toeaina, a e tula'i mai o le Toeaina Faatonu o le Mtg Lotofaga Lepa Aleipata. E 3 tausaga mulimuli ane ua avea ma Failautusi Komiti Au Toeaina, a e 2 tausaga sosoo ai ua Sui Taitaifono Fono Tele. Na ta'ua e le Faletua ia Teki i lana molimau, a o latou i ai i le falema'i i Middlemore, na faailoga faamanatu ai nisi o taeao iloga o lona soifua: o lona aso fanau 65 tausaga, faapea le 42 tausaga o la la'ua mafutaga faaipoipo (42 anniversary), aermaise le faamanatuina o le aso soifua o lona Alii, le Aso Kerisimasi. Talofa, ua maliliu toa! Faamaise le Atua i le Tina ma le fanau, le Ekalesia faanoanoa. Ia manuia lau malaga, i lo tatou nuu moni i le Lagi.

**Sauvia Faatonu Sulu Samoa.**

## **POUTASI I LE SATAURO O KERISO**

O le suafa lea ua faaigoa ai le malumalu fou o le EFKS Poutasi, Falealili o loo galulue ai le susuga Letone Uili FS ma le faletua ia Carol. O le Aso Faraili 23 Tesema 2022 na faapaiaina ai le malumalu, i le sauniga na ta'ita'iina e le susuga Tunumoso Soliola Iosia FT, o le Toeaina o le Pulega Falealili a o le KMTA/Komiti Faatonu o le Matagaluega Falealili Safata Siumu, o le afioga foi i le Taitaifono Fono Tele. O le faletua o le Failautusi Komiti Au Toeaina, Faafetai Leaso Tupa'i na ave i ai le fa'aaloalo na te 'o'oti le lipine, na tatala faitoto'a ma ulufale atu ai le mamalu o le faapotopotoga ma le au valaaulia mo le faapaiaina o le galuega matagofie. O se sauniga na faatumulia i le mamalu faale Ekalesia, faale Malo faapea le afioaga ma le itumalo o Falealili.

O le susuga Letone na saunoa i le Tala o le Galuega, na amata mai i le 1919 le tausaga na ofoina mai ai e le aiga sa Tuatagaloa le fanua e faatuina ai le malumalu. O le tuana'i ai o le Sunami tele i le 2009 na amata ai ona talanoa ina se malumalu fou ona sa afaina le falesa tuai. Peitai na fulisia lava finagalo o le Aulotu ina ia faalelei pea le malumalu tuai. Ui i lea sa le'i ma'alofia lava le tatau ai ona fausia se malumalu fou ona ua tupu ma toatele le nuu. O le amataga o le tausaga 2022 na faia ai le lotu faamavae i le falesa tuai na maua ai le tupe \$27,800. Na fai le Lulu a le Aulotu, ma o le mae'a ai o lea sailiga seleni, ma isi teugatupe sa i ai, na maua ai le Tupe Faavae o le galuega e \$317,618.

O le galuega sa tagi lava i lima, sa le'i faamoemoe i ni mafutaga a le afioaga i nuu ese. Sa talosagaina ma maua mai le Toomaga mai le Ofisa o Tupe a le Ekalesia e \$50,000, faatasi ai ma le faamalumalu a le Ekalesia i le nogatupe \$200,000. O le tau atoa o le galuega e tusa ma le tasi ma le kuata miliona tala (\$1,252,000). O le konekarate a Saina na fausia le malumalu matagofie, faatasi ai ma le lagolago a le malosi o le nuu ma le Aulotu. Na faamamafa le viiga o le Atua e ao ona siitia, seanoa o Ia e le manuia le faamoemoe. Sa toe faamanatu foi e le Toeaina, ina ia tautuana le lua o sauniga lotu, ma ia faamalolosi e o mai i le falesa e tapua'i i le Atua. Na taualuga le sauniga i le Sakarameta o le Talisuaga Paia a le Alii na ta'ita'iina e le afioga Taitaifono o le Fono Tele. Ona mapu atu lea o le mamalu o le aofia, i le taumafataga ma fa'aaloaloga maualuluga na saunia e le mamalu o le Ekalesia i Poutasi.

## **MAE'A NISI GALUEGA TETELE A LE EKALESIA**

O le faaiuga o lenei tausaga na molimauina ai le mae'a fausia o nisi o galuega tetele a le Ekalesia, e le gata i ana a'oga a e faapea i ana atina'e. O le Komiti o Feau Eseese o loo nafa ma le vaaiga, le asiasiga ma le faatinoga o soo se galuega e feagai ma le Ekalesia, pe o le Kolisi Faafafeau i Malua, pe o Kolisi tetele e 5 a le Ekalesia (Papauta, Maluafou, Leulumoega Fou, Nuuausala & Tuasivi) po o Atina'e ma soo se maota fou pe faafou, o le komiti lava lea a le Ekalesia e silasila i ai ina ia faatino Iugafono a le Fono Tele. Mo lenei tausaga 2022, na taualuga ai le gaasologa mai o galuega, i le mae'a fausia ai o le Maota o le Atina'e i Solomona. O le galuega na faatino e le Ekalesia i le tau e \$80,000, ina ia mapu atu i ai le aufaigaluega o loo galulue ai i lea atina'e a le Ekalesia. Sa faapea foi ona molimauina e le Komiti Feau Eseese le Fale Faatali Pasi fou ma le matagofie a le Kolisi Leulumoega Fou, mo alo ma fanau a le Ekalesia e faatali ai o latou auala e fo'i ai i aiga pe a tuua le aoga i aso taitasi. O lenei galuega na fausia e le Asosi/Faalapotopotoga a Matua ma Faiaoga o le Kolisi (PTA). O loo ua amata nei le fausia o falea'oga fou faapea fale o faiaoga, o le Kolisi Nuuausala, faapea foi le maota fou o le Faatonu A'o'oga Kerisiano Samoa i Malifa/Maluafou faamoemoe mo le amataga o le tausaga fou 2023.

## **MAUA I'UGA SU'EGA A'OA'O FESOASOANI**

O le fono a le Komiti Faatonu a le Au Toeaina (le komiti sa ta'ua o le Komiti o Mataupu Tau le Aufaigaluega/KMTA), na faamaonia ai i latou e to'a 38 ua faamanuiaina i le su'ega a A'o'o Fesoasoani. E maitauina le fulisia ia i latou mai Matagaluega i Samoa, ua manuia i lenei tausaga. E tusa ma Iugafono Tumau a le Au Toeaina, e 2 tausaga e auauna ai i latou nei ma lauga i totonu o a latou Aulotu ma Pulega; pe afai e maua o latou Tusi Faamaonia i le mae'a ai o le 2 tausaga, ona mafai lea ona lauga i le Matagaluega ma soo se tafa o le Ekalesia. E na o le to'a tolu lava A'o'o Fesoasoani a le Aulotu, a e le aofia ai i latou e liliu atu mai isi Aulotu/Pulega/Matagaluega. O i latou faatasi ma latou faletua, e fesoasoani malosi i le Faafeagaiga ma lona faletua, i le galuega lautele a le Ekalesia; latou te maua foi faamanuiaiga, a e le penisione i latou.

## **'FEAU O LE ASO' I LUGA OLE UPEGA ALE EFKS**

O le masina lenei o Tesema 2022 ua amata ai se isi auaunaga faaopoopo a le aufaigaluega Faifeau ma A'oa'o I'u Malua o le Ofisa Tutotonu i Tamaligi. O lenei auaunaga ua faaigoa o le Feau o le Aso (*Message of the Day*), i luga o le Upega Tafailagi a le EFKS ([www.cccs.org.ws](http://www.cccs.org.ws)) i aso taitasi. O lenei auaunaga o se faatofalaiga faamaite e le afioga Failautusi Aoao, susuga Vavatau Taufao FS na lagolagoina e le afioga Teutupe susuga Melepone Isara FS. Ua faasolo ai o le faigaluega ma lona vайaso atoa, e saunia mafaufauga faaleagaga o le aso, e faavae i luga o Tusi faitau o aso taitasi (IBRA). O le faasologa ua fai nei e amata atu ia Tesema, na tomua lava le susuga Failautusi Aoao sosoo ai le Teutupe se'ia tofusia uma, aulia le masina o Mati ona toe faasolo foi lea. O le faamoemoe maualuga lava ina ia faala'e'i auina ai le soifua molimau ma le ola tautua o le au faatuatua ma le Ekalesia, a o alo faiva i tiute ma tofi masani, tainane faamoemoega faapitoa o aso taitasi. Ia manuia lau faitau, mafaufau loloto ma ola ai mo le viiga o le Ao o le Ekalesia, lo tatou Alii o Iesu Keriso, o Ia e ana le feau.

## **KERISIMASI I LOU AIGA**

O le lona hua lenei o tausaga talu ona fai le polokalamo a le EFKSTV, 'Kerisimasi i lou Aiga' i le masina lenei ma le vaitau o le Kerisimasi. E manatua ai le susuga Atapana Iosefa Uilelea FT na ia tatala aloaia i le 2021, a o avea ma Taitaifono Fono Tele. Lenei tausaga lona lua, ua faapea foi ona tamua ma tatalaina e le afioga Taitaifono Fono Tele 2022 susuga Tunumoso S. Iosia FT & Susana ma le EFKS Sapo'e. E molimauna ai le taulamua ma lagolago malosi a susuga Toeaina ma Faletua, o lenei polokalamo o pesepesega o le Kerisimasi ma viiga o le Atua. O le faasologa mai le Aso Sa 11 Tesema sei faai'u i le Aso Toonai 24 Tesema: EFKS Sapo'e, EFKS Luatuanuu, EFKS Ketesemane fou, EFKS Matautu-tai, EFKS Fasitoo-uta & EFKS Afega, EFKS Vaie'e, EFKS Leulumoega, EFKS Uafato, EFKS Satuimalu filifi, EFKS Samalaeulu, EFKS Safotu, EFKS Fatausi, EFKS Faiaai, EFKS Gautavai. Sa faasalalau tuusa'o e le EFKSTV, ma e maualuga le faamoemoe o le a fa'aauau pea lenei auala o le faasalalauina o le Tala Lelei, i lena foi tausaga pe a tusa ma le pule alofa a le Atua.

## **MEAALOFA KERISIMASI**

"<sup>15</sup>Faafetai i le Atua i lana mea foai fua e lē mafaamatalaina!" *2 Kori 9.* Ua ta'u mai e le aposetolo, o le mea alofa na foai fua mai e le Atua mo i tatou taitoatasi i le ulua'i Kerisimasi, o le mea alofa e lē mafaamatalaina. O lona uiga e leai ni upu, tala ma gagana a le tagata, e mafai ona faamatalaina ai i lona atoatoa lelei, o le silisili ese, le maualuga le loloto ma le lautele, o lenei fa'aaloalo faatupu faatamalii. O loo faaupu e isi Tusi Paia faapea, ua matuā matagofie na'uā mo upu, pe faapea foi, e lē agavaa ni upu e faamatala ai. O se tasi o mafuaaga o lenei lē mafaamatalaina, ona o le meaalofa o le Kerisimasi, o Iesu Keriso, o Ia o le Atua o Ia foi o le tagata. Fai mai Isaia 9:6, "*Auā ua fanau mai mo i tatou le tama, ua foa'iina mai mo i tatou le atalii.*" E iloa lona tulaga tagata i lona fanau mai, e pei o tagata uma. Peitai e iloa lona tulaga Atua, i le foa'iina mai o Ia, auā sa i ai lava o Ia mai le vavau, ua oo i aso e tatau ai, ona foa'i mai loa lea. O le mafuaaga lea o le avea o Ia ma tali i lo tatou puapuaga faaleagasala. E malamalama lelei o Ia i le pule ma le alofa faaleAtua, e silafia manino foi e Ia tauiviga ma vaivaiga o le tagata. O le meaalofa sili mo le Kerisimasi ma le olaga atoa, i ona itu nei: Muamua, o Ia o lo tatou puluvaga/faamasino! Fai mai Iopu, "*E le o i ai foi se faamasino i lo ma va, e tago mai lona lima ia te i ma'uā.*" 9:6. O le faamasino e sili atu o ia nai lo na o se laufali po o se amupaea; e mafai e le faamasino ona aiā ma aafia i le tausinioga/faamasinoga, ina ia aumaia vaega e lua e faatasia ma faalelei – o le tasi lima e taofi ai le tasi vaega, ma le isi lima mo le isi itu. O lona uiga, pe afai e te fetaia'i ma faalētonu, e faae'e atu e Iesu le tasi ona aao i ou luga, a o le isi i le Atua, ina ia maua pea le lua fesoota'iga ma le Atua aunoa ma le motusia. O lona lua, o Ia o lo tatou fautua. "*O le mea foi lea e mafai ai ia te Ia ona faaola pea lava i e faalatalata atu i le Atua ona o ia, auā o loo soifua pea ia e fautua mo i tatou.*" Eperu 7:25. Pe afai e tatau lava ia te oe ona e manatua au agasala uma, o agasala na fai ma agasala o le lē faia, i aso taitasi, o le a lē mafai ona e maua se moe pe mālōlō; e te ola e tootuli i tulivae i taimi uma ma le aso atoa. Peitai o le maliu o Iesu ua ufiufi ai mea leaga uma na e faia, ma lona soifua e ufiufi ai mea lelei uma sa tatau ona fai a e le'i faia. O lona uiga, e agavaa atoatoa o Ia e fai mou sui, e fautua mo oe, i luma o le nofoalii o le Atua. Faauta i le mea alofa lē mafaamatalatalaina a le Atua!

# O LE PEROFETA MULIMULI

(*O le Tala Faa-fagogo ua faa-Samoaina mai le tusi, The Last Oracle, tusia e James Rollins*)

O le toe faatasia o tamaiti ma le manukī i le auala pito i lalo, o se mafutaga mafanafana tele. E ui ina malomaloā le sailini ma le gatete solo o tamaiti, a e na tago ane le manukī ma tuu atu tamaiti i lalo o ona ‘ao’ao ma opoopo i latou i le uiga faatinā e faafailele. Na ta’utino e Monike o le auai o le manukī na fesoasoani tele i le faato’afilemuina o tamaiti.

O le taimi nei ua filemu, i lona militino faatasi ai, e faalagolago atu i ai ma latou fesoota’i.

O le aupito itiiti, o Piota, sa sili ona ave i ai lana faamamafa. O le toalua lea pei sa i ai se la’ua fesootaiga faapitoa. E lē o se gagana i faailoga, a e peisea’i o le gagana i gaioiga o le tino: o se pa’i atu mālie, o se tilotilo atu i mata mo se taimi umi, ma isi gaioiga o fesootaiga. O le tamaititi sa vaivai i le a’e mai o le auala, ua maua le malosi fou mai le manukī faa-tina.

Na kolosi atu Konesetatino i le faleoo. Na ia tuu atu se tama’i pine uga ia Monike ma faasino atu pe faapefea ona faapipii i lona ovalola.

“O le a lea mea?” na fesili ai Monike.

Na geno atu Konesetatino faasino i le faitoto’ a o loo tapuni. “O le pine e faailoa ai...mo laasaga o le aafiaga i uila vevela.”

Na faataupupula atu Monike i le faitoto’ a o loo tapunia. Uila vevela? O a mea o loo i tua atu o lena faitoto’ a? Na ia manatua le vevela na ia lagonaina ina ua pa’i atu lona alofi lima i le tapuni. I totoru o lona fai’ai, na ia valiina ai se ata o se laufanua faatama’ia ma ua liu otaota ma efuefu.

Ua sauni tagata uma, ona laa atu lea o Konesetatino i le tapuni ma susu’ e malosi le liva na faamau ai. Na matala le faitoto’ a.

O se susulu malosi faapogisa mata na tafe mai i totoru, e pei ai ua pupula i se afi mai se ogau mu. Na pupuni e Monike ona mata i lona ogalima. E lua isi ana mānava, a e na faato’ a ia iloa ai, ua na o le susulu o le la o loo taia ai lana vaai. Na latou tau sūsūlū atu i fafo ma tamaiti.

Sa le’i faatama’ia le laufanua ma liu lefulefu e pei ona sa ia manatu ma fefe i ai.

O le upu moni lava, e matua’i tuu faafeagai lena ma le tulaga moni.

O le faitoto’ a sa matala atu i se malifa e mafafia le laufanua, i vao ma laau. O le tele o laau ua pei sa mu i le suiga o le tau. I se tasi itu, sa i ai se vai e pa’ū ifo

lana tafe i luga o papa e lanu meamata i le limu. O atu mauga maualalalo sa faasolo mamao ese atu, e togitogi i nai vaituloto laiti na iila mai pei ni mataua ario.

Ua latou a’ e ese mai seoli tau mai i le parataiso.

Peita’i e le’i uma ese foliga o seoli.

Mai le ana sa i o latou tua, na latou lagona atu ai se tagi ū uiga ese o aga’i mai. Na manatua e Monike lona lagonaina o lea lava tagi po o le ū na sau mai fale na puipuia e tuaoi ma le falema’i.

Le Menakeri.

Na tali atu le tagi lona lua ma le lona tolu.

Na te le’i mana’omia le tulei atu o Konesetatino ina ia topetope atu i fafo.

Na iloa e Monike le tagi o loo ia faalogoina – e lē mai lona manatua faalemafaufau, a e mai le vaega tanumia o lona fai’ai o loo tusia ma faamauina ai pea le lagona faalenatura o le manu e faasaolo ma le manu e fasia.

Na toe mānu a’ e le isi tagi ou.

O loo sailia ma tulituliloa i latou.

6 Setema, 4.55 i le taeao.

Uosigitone.

Na avea pea o ia ma misiterio i totoru o se affi itiiti. Na iloilo lelei e Penita le teineitiiti mai le faamalamā. O lena ua moe. Na mataala ai pea Kati Pariani i autafa o lona moega, ma le kopi o le tusi a Foma’i Seusu, O Fuamoa ma Fasipua’ a Lanumeamata, i luga o ona vae. Na ia faitauina atu i le teineitiiti se’ia oo ina ulu le vailaau ma faamoe ai o ia.

E le’i tautala le teine i se upu talu ona latou taunu mai i le valuapō. Na feoa’i solo ona mata e maitau mea, e manino sa ia faamauina lelei mea uma na tutupu i ona tafatatafa. Peita’i sa itiiti lava se isi tali atu. Na fa’alu le tele o ona taimi i le faalue atu ma faalue mai, e faamalō pe a pa’i atu se isi. Sa mafai ona latou faainu o ia mai se pusa sua ma ‘ai ni ana masi sukalati se lua. Na latou faia foi ni su’ega: o siaki o le toto, o le tino atoa, e oo lava i le siaki o le fatu. Sa i ai pea se fiva maulalo, e lē pei o le maualuga sa i ai muamua.

O le faiga o le su’esu’ega, na latou maua ai foi le pine o fesootaiga faasalalau na faapipii mamao i totoru o le ogalima pitō i luga o le teine. E mana’omia

se ta'otoga e aveese ai lenei pine, ona latou manatu lea e taatia ai pea. I le ma lea, sa punitia ma taofia soo se fesoota'i i totolu iinei, sa poloka. O le a lē mafai ona saili mai e nisi.

Na minoi Kati ma nofo a'e i luga. Sa la'e i le fafine i ofu masani, o lona lauulu enaena mūmū na nanamu faasaga i le ofutino pa'epa'e talaloa na ia ofu i luga a'e o le ofuvae faasavili. Na valaauna o ia i le ofisa tutotonu mai le aiga ina ia ta'ita'i gaioiga o loo faatino i le fanua, peita'i a o i ai pea le vaega a Karai i luga o le ea, na ia manatu ai e sili lona aogā iinei. O le i ai foi o lona afafine, na ia aumaia ai le kopi o le tusi a Fomai Seusu. E ui ina sa le'i tali mai le teineitiit, a e na ia faamafanafana ia Kati. Na faalēmū teisi lana faalue.

Sa fiafia Penita ina ua toe sau Kati e galue. O le tuana'i ai o le maliu o lana tane, o Monike, sa ia faatafetafea ai mo vaiaso e tele. A o lenei ua foliga mai ua ia toe faafouina, ua toe agai i luma.

Na ia laa ese mai le potu, ona tapuni lēmū lea o le faitoto'a ma faatasi atu ia Penita i le potu su'esu'e e sosoo ai. Na si'omia le laulau fono i nofoa teuteuina lelei.

"O loo moe o ia." Na goto ifo Kati i se tasi o nofoa ma le mapu ea.

"E tatau foi ia te oe ona fai sau moe. Toe o nai itula ona tu laueelele lea o le vaalele a Karai i Initia."

Na luelue lona ulu. "O le a ou siaki muamua i le nofofale po o ai o loo vaaia Penelope, ona fai lea o se taoto mo nai itula."

Na matale le faitoto'a e tau atu i le potu tele i fafo. Na la'ua liliu atu ma vaaia Lisa Kumini ma le alii su'esu'e o faama'i, Malakoma Teni, o ulufale mai. O le toalua lea sa la'e i tutusa i toniga ofuvae papa'e ma talipetu lanu moana, sa feagai ma se talanoaga musumusu. O Lisa sa i totolu ona lima i taga o lona afuvae, sa toso mau atu le peleue i ona tau'au, o se faailoga o lona matuā mata'ituina o le mataupu sa tagofia. Na fili faa-Farani lona lauulu uumi lanu enaena. Ua alu le itula talu ai ona la'ua faatasi i totolu o le potu su'esu'e, o talanoa i'uga o su'esu'ega.

Mai le si'isi'i o la la'ua talanoaga ma faafinauga i leo fiafia – e tumu i gagana ma faaupuga faa-foma'i e nunumi ia Penita – e iloa ai ua taunu i se faaiuga, a e lē avea o se tulafono maumaututū.

"O le feumiaiga faaneura i le maualuga lena e aunoa ma se lagolago atu o sela?" o le tala lea a Lisa ma le lūlū o lona ulu.

"O le faaosofia o fetaulaiga o lagona, o le upu moni, o se mea e talafeagai."

"E mo'i?" o le fesili atu lea a Penita, ua tosina mai ai la la'ua faalogo ma le vaai.

O Lisa sa pei ua na faato'a vaaia Penita ma Kati. Sa faaloloa ona tau'au, ma ona lima ua tuu ese mai taga o lona afu. Sa tau musumusu se 'ata'ata i ona foliga ina ua fetau i lana vaai atu ma lana pupula mai. Na tosotoso atu se tasi o ona lima i le tau'au o Penita a o ia pasi atu ma nofoia se tasi o nofoa.

Na ave e Malakoma le nofoa na totoe. "O faapefea mai le teineitiit?"

"O loo moe i le taimi nei," o Kati lea.

"O le a la se mea ua tatou a'oa'oinga?" o le fesili lea a Penita.

"O loo tatou aga'i atu i se laufanua e fou toe tuai," na tali faanunumi atu ai Malakoma. Na ia faamaulu semata tioata, sa faalanu moana feliuliua'i ina ia fetau i ma le sesega o le laau komepiuta. Na mautū, ona tatala lea o lana laau lapetopa sa tauave i lalo o lona tau'au. "Ua matou tuufaatasia i'uga o su'esu'ega ma fa'ata o le teine faatasi ma la'u faatulagaina o lona tigipoo. E tutusa uma, e ui ina e tulaga ese ma lavelave le saililiga mai le teineitiit."

"O a na mea?" na fesili atu ai Kati.

"E mafuli le tele i afi TMS," na tali atu ai Malakoma.

"O masini faamaneta o faafesootaiga," na faalautele atu ai e Lisa, e ui ina e le'i fesoasoani tele.

Na faasoaa tutusa e Penita ona foliga nunumi lē malamalamāma Kati. "Aiseā e te lē toe amata lelei mai ai i le amataga?" na ia fesili atu ai. "Ma fa'aaogā upu faigofie."

Na tātā e Malakoma le itu o lona ulu i le peni. "Ia o le a tatou amata iinei. O le fai'ai o le tagata. E i ai neuron i faitau tolusefulu piliona. E fesoota'i neuron i taitasi i o latou tuaoi i auala faasinape eseese e tele. Ma maua ai fesootaiga faasinape e tusa ma le miliona piliona. O nei fesootaiga, latou te fausia foi nisi matagaluega neura se tele. Ma e faia i se faatulagaga e faitau faasefulu mulimuli mai ai fuainumera selo e miliona."

"E miliona selo?" fai atu ai Penita.

Na autilo atu Malakoma i le pito o lana tioata ia Penita. "Ina ia avatu se fua faatusa ia te oe. O le aofai o atomi i le lalolagi atoa e na o le sefulu mulimuli mai ai selo e valusefulu."

Na segia le mauli o Penita, ma luelue atu ai le ulu o Malakoma. "O lona uiga o loo i ai le malosi faakomepiuta o loo loka i totolu o tatou tigipoo o lea faato'a amata ona malamalamāma i ai. Ua na o le pito laualuga o loo tatou valuvalusia." Na ia tusi atu aga'i

i le faamalama. “E i ai se tagata i fafo atu na ia ‘eli maulalo ifo teisi.”

“O le a le uiga o lau tala?” na fesili ai Kati, o ona foliga ua faailoa lona popole mo le teine.

“E tusa ai ma lo tatou atamai faa-tekonolosi ua i ai nei, sa tatou tauivi mai ina ia ausia nei laasaga fou. E pei o le auina atu o su’esu’ega i le vateatea, lo tatou monomono atu o eletoroti i totolu o le fai’ai. O mea uma e tuu i le fai’ai e auala atu i faalogona faaeletise. Tatou te lē vaai i o tatou mata. Tatou te vaa i o tatou fai’ai. O le mafuaaga lena e mafai ai ona toe faalogo le tutuli, ina ua totō ai totoga kokolea. O totoga totō latou te liua leo i lagona faaeletise, e pasi atu i le fai’ai e ala i le maikoroelise o loo faapipii i le neura faalogo. I le gasologa o aso, e iloa ai e le taliga ona faaliliu nei faailoilo fou, ma e pei o le a’oa’oina o se gagana fou, e faapena le tutuli ona amata ona toe lagona mea.”

Na tusi atu Malakoma i lana laau kemopiuta. “O le fai’ai o le tagata – ua faaeletise, ua faafetaui i faailoilo fou – e i ai le mafai e fesoota’i ai i masini. I se isi itu, o tatou lava o masini faatonutonu atoatoa lelei na fananau mai.”

Na faapuiti mata o Penita. “O fea e te alu i ai ma nei mea uma?”

Na tuu atu e Lisa lona lima i luga o le lima o Penita. “Ua uma ona tatou taunuū i ai iina. O le vaevaeina o masini mai tagata ua amata ona faanenefu mai. Ua tatou maua nei maikoroelosi o lo latou ninii tele ua mafai ai ona faigofie le faaulu atu i neuronu o tagata taitoatasi. I le Iunivesete o Palauni i le 2006, na latou ulufia ai se maikorotipi i totolu o le fai’ai o se tamaloa e gase le tino, e fesoota’i ma le faitau selau o nei maikoroelosi. I totolu o le fa aso o faataitaiga, o le tamaloa – e ala i le na o ona mafaufauga – na mafai ona ia faagaoi le pine o le komepiuta i luga o le tv, tatala i-meli, faatonutonu le televisé, ma faaminoi le lima o le masini ropota. O le mamao lena ua oo i ai la tatou saililiga.

Na tepa atu Penita i le faamalama. “Ma sa i ai se tasi na sili atu lana taumafaiga?”

Na tau fai lue ulu o Lisa ma Malakoma.

“O le mea faigaluega?” na fesili ai Penita.

“O se sitepu i luga atu nai lo se isi lava mea ua iloa. E i ai ona nanofilamena eletoroti e matuā ninii lava, e faigatā ai ona iloa le mea e gata ai le mea faigaluega, a e amata ai le fai’ai o le tamaitiiti. Ao lana mataifaioi faavae ua lauiloa. Mai su’esu’ega na fai i le Iunivesete o Havati i isumu, ua tatou iloa ai o mea faigaluega TMS latou te faalauiolina le tupu a’e o neuronu – e

ui ina e tulaga ese, na o vaega e aafia ai le a’oa’oina ma le manatua. Matou te lē iloa lava pe aiseā. Peitai o le mea ua matou iloa, o faaosofiaga faamaneta e mafai foi ona latou faaola ma toe tape nei neuronu e pei o se ki. O tamaiti e sili ona mautū ai.”

“O lona uiga pe afai e sa’o lo’u malamalama lea ua i ai, e i ai le tagata na ia faauaea ma tuu le mea faigaluega i le tamaitiiti, e faaosofia le tupu a’e o neura i se nofoaga faapitoa, ma ua pulea nei ma faatonutonu lona gaioiga pei se ki.”

“I le gagana lautele, o lena lava.” Fai atu ai Malakoma. Ua latou su’esu’e ma tagofia loloto atili le fesootaiga faaneuronu sa ou faamatalaina atu. Pau lava o faaosofiaga faamaneta o neuronu fou, ua latou faalautele ma talatala teisi atu le fesootaiga. Ma afai e sa’o a’u, ou te fai atu ua latou faamamafa lena faalauteleina i se nofoaga va-apiapi.”

“Aiseā ua e faia ai lena tala?”

“E i ai le tulafono i le faa-neuronu. O le tulafono a Hepe. E faapea mai o neura e mumū pe faea faatasi e uaea faatasi. O le faaosofia o se tasi itu o le fai’ai, o lo latou faamalosia atili lava lena ia saga malosi.”

“A e i le ā le i’uga?”

Na fefaa sooa’i pupula o le popole e Malakoma ma Lisa. Na mana’o le alii e faamatala e le tamaita’i. Na mapuea Lisa. “Na ou talanoa i le fomai saikolosi o Saki Lasoni, o ia na su’esu’eina le teine ina ua faato’ a aumai i totolu. E mai lona lē tali mai, o ana tu ma aga fai soo, ma lona aafia gofie i faaosofiaga, ma mautinoa ai e Saki o le teine e i ai ona manaoga faapitoa, e lē atoa lona mafaufa. A e mai lana amio sa e faamatala mai i le fale malu puipuia, masalo o se lē atoatoa e atamai tele.”

O Penita na ia faitauina foi le lipoti a Lasoni. O se lipoti na tuu faatasia faanatinati, peitai sa atoatoa. Na ia faia ni nai su’esu’ega faa-saikolosi, aofia ai se sailiga o totoga mon i faailoga e iloa ai le tulaga o ma’i faalemafaufau. O loo faatali pea le tali o le su’ega mulimuli.

Na ia aoina foi pepa o talaaga moni i le mataupu o gasegase faalemafaufau atamamai, i latou taitoatasi e seāseā maua – e ui ina faaluafesasi i o latou vaivaiga faalemafaufau – a e maoa’ e le talenia i tulaga faapitoa. O agavaa e loloto ma papa’u. Na manatua e Penita le tagata sa faatino e Tasitino Hofomanu i le ata tifaga o le Tamaloa o Timuga. O lana taleni o le sailiga o tali i le emo o le uila. Peitai ua na se tasi lea o taleni i le lisi a Lasoni. O nisi taleni e aofia ai le sailiga o tali i le kalena, o le talenia i le manatua ma tauloto mea, taleni tau musika, o galuega faainisinia,

o le maitauina o eseesega o manogi, tofo, po o le faalogo, faapea tusiga ata.

Na faa-ata e Penita le tusiga o le ata o le Tai Mahala. Sa tusia i ni nai minute, valivali lelei i le fua faatatau o le maota, ma sa paleni lelei lona faataatiaga. E talenia mo'i lava le teineitiiti.

A e pe mata e i ai se isi mea e sili atu nai lo lena?

O le aupito mulimuli i le lisi o taleni a Lasoni o se lipoti lē maua soo ma fesiligia lona tonu, o nisi o ma'i atamamai na latou faatinoina le poto maoa'e.

Sa le'i teena e Penita, o le tusiga ata a le teine na ta'ita'iina ai le au Kipisi i lo latou fale malu puipuia. Na ia manatua le talanoaga muamua atu ma Elisapeta, faasino i le galuega a lona tamā e uiga i lagona ma faalogona, faatatau i lona fesootaiga ma se poloketi uliuli pato'i a le malo e aafia ai matamataga mamao.

Sa fa'aaauau pea Lisa, "Matou te manatu o le meafaigaluega na fuafua e faaosofia le itu o le faiai o loo taoto ai le taleni. Ua lau silafia uma o le tele o taleni e tutupu a'e mai le itu taumatau o le fai'ai, o le itu foi lena sa faapipii ai le meafaigaluega i le ulupoo ma le teine. Pe a fa'aaoga le tekonomosi o aso nei, e leai se umi e sailia ma maua ai le itu tonu e faapogai i lea taleni. Ma e maua loa, ona pulea loa lea ma faatonutonu e le maneta faaosofia."

Na tu Penita ma lona matuā gatete ma le mata'u. Pe afai e sa'o Lisa ma Malakoma, o lona uiga sa i ai se tagata na ia faagutua le atamai agavaa o le teineitiiti. Na ia kolosi atu i le faamalama.

O ai na faia lenei mea i si teineitiiti?

Na faatasi atu Kati ia Penita ma tusi atu i le faamalama. "Ua ala mai o ia."

Ma o le la foi ua toe tusi lana ata.

Na maua e le teine se api ma se peni lanu uliuli i luga o le laulau o le moega. Na ia osiosi ai, e lē faatopetope pei o le taimi muamua, a e sa punou pea ma mata'itū le lautusi.

Na savali atu Kati i le faitotoa. Na mulimuli atu ai Penita.

Sa le'i amana'ia e le teine i la'ua, peita'i ina ua la sopo'ia atu, na faapa'ū ifo le peni ma le pepa i luga o lona 'ieafu. Na ia toe foi i lana faaluega.

Na faatau pupula ifo Kati i le ata na tusi, ona toe laa solomuli teisi lea i tua ma le te'i ua matala ai lona gutu. Na malamalamana Penita i le mafuaaga o lona faate'ia. Sa le'i taumateina i le vaai, le ata sa tusi i le pepa, o le ata o se tagata.

O le ata o lana tane, o Monike.

11.04 i le taeao.

Atu Mauga i Saute o Urale.

Malo o Rusia

Na fesoasoani atu Monike e ave Piota i luga o se laau na pa'ū ma faalava i luga a'e o se vai loloto, ma lūlū i luga a'e o papa ua nuti. Na sosolo le limu i luga o le ogalaau, faapea ma nai pulou aitu. Na manogi pala atoa le nofoaga.

Ua taunuu Kisika i le isi itu, o loo tutū ai ma Marata, o loo taofia le vae o le manukī.

Na mana'o Monike ina ia sopo atu i le isi a'ega ma taunuu i le vanu o sosoo ai. Na ia oso ese mai le ogalaau, ma faataupupula atu i ona tua. Ua latou laasia se vaomatua mafiasia i laau o le ituaiga o paina fai laupapa, o latou pa'u lanu papa'e e foliga o ni ponaivi mamago. Ua folasia atoa ai le fanua lanu meamata i o latou lau e pei o se afi.

Na tago atu Monike i se tasi o lau lanu mūmū, ma oloolo i le va o ona tamatamailima. O loo galemulemu lava, e le'i mamago. Ua lata mai le suiga mai le tau mafanafana i le tau mālūlū. Peitai o suiga o lau laau ua latou folafola mai se po malūlū i atumauga maualalalo iinei. A e o le mea sili o le a i ai se kiona. Na ia faato'ulu ifo nutiga laulaau.

Na faapefea ona ia iloa nei mea?

Na lūlū lona ulu. O tali o nei ituaiga fesili e faatali mo se taimi. Ui i lea, sa faalavelave pea ia te ia, pe na faapefea ona vave tele lona masani i le fesootaiga o le leai o sona manatua, ma lona malamalamana lelei i tulaga o le natura o le lalolagi. A o le isi foi itu, o loo sailia i latou. E ao ona latou minoi ma le filemu, auā o i'uleo e mamao le salalau ai i totonusi o atu mauga. Na latou fesoota'i i le gagana o musumusuga ma faailo o lima.

Na saili Monike i le isi itu mamao atu o le vai. Sa latou fesulufa'i mo le tolu itula. Na ia taitaiina le latou auala faatelevave, ina ia mamao lo latou va ma le mea na latou ulufafo atu ai mai le lalolagi o i lalo. Na te le'i iloa po o le a le umi e silafia ai e tagata tutuli, o i latou o loo sosola ua tuua le ana, ona latou mulimuli atu lea i lo latou auala.

Na faatali Monike i le faasi'usi'uga o le vai.

O fea o i ai Konesetatino?

Sa pei e valaau e ona mafaufauga le tama umī, ina ua sivasiva mai o ia mai le mati'e mamao ese, i ona vae mau pei o se tama'i manu po'a. A e o ona foliga, sa pei o se uifimata o le fefe, a o ia tu mai ma ona lima faalalava, i luga o le ogalaau mase'ese'e.

## **NA O AFIOGA E TULEI MAI FOFOGA O LE ALII**

### **Aua le tuulafoa'iina lou faatuatua**

“<sup>3</sup>ia tusa ma le tofiga o le faatuatua ua taitasi ma tofu ai mai le Atua.” Roma 12.

E lē mafai ona tatou nofonofa faasamasamanoa e aunoa se galuega e fai, i se talitonuga e fai e le Atua mea uma mo i tatou. E i ai la tatou pito laau e fai. Fai mai le apostolo o Paulo ua tofusia i tatou taitoatasī ma le tofiga o le faatuatua mai le Atua. A e fai mai le apostolo o Iuta tatou te ati a'e faaleagaga, “<sup>20</sup>ia outou ati a'e ia te outou i lo outou faatuatua e sili ona paia...” O le faatuatua e feagai ma osofa'iga, o le faatuatua lena o loo feagai ma lona fausaga. O totou o taua o le soifuaga tatou te iloa ai pe se faatuatua o faafaileleina, po o se faatuatua ua tuulafoa'iina lo tatou faatuatua.

I taimi o le Feagaiga Fou, e toatele fitafita Roma sa latou tau'aveina le talitā po o le tali pupuni o se vaega o la'e i mo le taua, e puipui ai le tino mai le ula se'ia oo i tamatamaivae. Na fausia i laau a e teu i pa'u ma tapoleni mafafia. O lona fausaga faa'ofu'ofu e aogā pe a fana mai ū a le fili, e taia ma lelea ese ai le ū aunoa ma le afaina o le soifua o le fitafita. O le uiga lea o le faapea mai o le apostolo, “<sup>16</sup>Tago atu i le talipupuni o le faatuatua, tou te mafai ai ona tinei o u fanafana mu uma lava a lē o loo leaga.” Efeso 6. E lē mafaia e u fanafana a Satani ona ati i lou loto pe afai e mamā, e tumu i afioga a le Atua, ma puipuia e le faatuatuaa.

O le ala lena na fai atu ai Iesu ia Peteru, “<sup>31</sup>Faauta, ua mana'o tele Satani ia lūlū ia te outou pei o le saito; <sup>32</sup>A ua ou faatoga mo oe, ina ne'i mavae lou faatuatua.” Luka 22. O lou faatuatua lena o loo osofaia e le fili! O lou faatuatua o loo manaomia le fafagaina! O lou faatuatua na te lagolagoina oe i taua o le soifuaga nei! Ua a'oa'o mai Iesu ia faatuatua i le Atua (Mareko 11:22). O le taimi e te fa'aalu e mafuta ai ma le Atua e ala i le faitau o ana afioga paia ma le tatalo, e faamalosi ma faaaauupegaina ai lo tatou faatuatua e manumalo ai i tauiviga o le olaga nei.

### **Faataalise, faafetaui, faamagalo.**

“<sup>1</sup>Ua na alofa i ona tagata o i le lalolagi, ua ia alofa ia i latou ua oo i le gataaga.” Ioane 13.

Pe a tula'i mai o tatou faafitali i fesootaiga ma faiā, ona tatou togafitia lea ma fofō i se tasi o auala nei e

tolu: o le faataalise pe sola ese mai ai, o le faafetaui i finauga ma misa, po o le faamagalo. O nisi e filifili e tuua le mafutaga, ua lava lea, ua lē lavā onosa'i, ua uma faiga lelei, atonu e lē se finagalo o le Atua le saga fa'aauau pea. Ona faataalise ese lea ma toe fai isi sootaga fou, fesootaiga ma isi faiā o amataga fou; ma faate'ia i le toe ali a'e mai o faafitali na sola ese mai ai, i lenei foi mafutaga. O nisi e nonofo ai pea e faafetaui, e misa ma finau i upu ma tala o manatu ma talitonuga poo ai e sa'o. O se mafutaga o feteeaina ma eseesega, ua avea le ita ma le inoino o se lagona masani o le olaga. Peitai o tagata e popoto ma atamamai, latou te filifilia le auala a Keriso: “<sup>1</sup>Ua na alofa i ona tagata o i le lalolagi, ua ia alofa ia i latou ua oo i le gataaga.”

Pe sa faigatā ia Iesu ona nonofo tumau ai pea ma ona soo? Sa faigatā ia te Ia ona alofa ia Simona Peteru, e ui ina sa Ia silafia lelei e i ai le aso na te faafiti ma faatō ai ia te Ia? Sa faigatā ia te Ia ona talitonu ia Toma, ina o silafia e Ia e i ai le aso na te fesiliglia ai Lona toetū? Sa faapefea ona teena e Iesu le mana'o e sui nisi ona soo? Na mana'o Ioane e faaumatia nisi o fai ma fili, o Peteru na ia tipi ese le taliga o le isi fili. O nai aso a o lumana'i lona maliu, sa latou fefinaua'i ai po o ai e sili!

Sa faapefea ona la gafatia le alofa atu i tagata sa faigata ona oso i ai se alofa i le tele o taimi? O le tali, ona sa le'i fuaina e Iesu i latou i o latou foliga ma uiga ma amio, i ni mea sa latou maua ma mea na vaivai ai. A e na Ia fuaina i latou i o latou agavaa latou te gafatia ma mafaia ai. Ma e sa i'u lava ina suia i latou ma soifua ai e tusa ma naunautaiga o le Alii. E lē o mea uma ma taimi uma. A e a oo mai taimi ia, ona Ia faamagalo atu lea ma a'oa'o i latou, o le alofa o se mea e muamua ona tatou faia ia i tatou, ona faato'ā fai lea i le isi tagata.

### **Mafaufau Loloto ma Faapuna**

“<sup>16</sup>Ia nofo le afioga a Keriso i totou ia te outou ia tele lava.” Kolose 3.

O le Mafaufau loloto i Afioga paia a le Atua o se tasi o ki i le tupu lausiusi faaleagaga. Ille ulua'i Salamo o loo tusia ai e Tavita, “<sup>2</sup>e mafaufau foi o ia i Lana tulafono i le ao atoa ma le po.” Peita'i o upu mafaufau loloto e lē o le auala ua masani ai ma faia

e tupulaga i nei aso o le saosaoa o le tekonomosi. Tatou te mafaufau i monike ma o latou foliga faautauta e laei i ofutino lauulu ma memumemua a latou tatalo a o tootuli i tulivae i le oso a'e o le la i aso taitasi. O le iuga tatou te fia sosola ese i le isi itu. Tatou te faamemelo ia i latou, tatou te mafaufau ane mata e valaau mai le Atua ia tatou faapea, ma fai ai le faaiuga e leai, e lē o valaau mai le Atua tatou te faia faapea. Pe tatou te faapea ane foi, o le mafaufau loloto o se feau faapitoa e manaomia ai ni itula se tele o taimi e lē faalavelaveina, a o le taimi, o se tasi o mea ua utiuti lava i nei aso. O le a le i'uga? Ona tatou ola lea i se olaga e pisi, a o ni olaga e gaogao ma mātūtū faaleagaga.

O nisi o i tatou e manatu o le mafaufau loloto o se mea lelei, a e tatou te talitonu e i ai nisi vaega o le ola ati a'e ma le tuputupu a'e faaleagaga e tatau ona faamuamua. O lona uiga, o le ā le faafitauli? Tatou te lē matuā malamalama lelei i le uiga o le mafaufau loloto, po o le tamaoaiga o ona manuia na te aumai mo tatou. Afai e te fia tofo tau lava o le manogi o le kofe, ona e fai lea na o sina sipuni ti e tofo ai. Peita'i afai e sili atu lou mana'o – e te fia maua atoa le manogi, le tofo lelei, le tamaoaiga o loo i totolu o le kofe – e tatau ona **faapuna** lelei. O lona uiga, pe afai e toe faaupu le Salamo a Tavita, ona faapea lea, *E faapuna foi e ia lana tulafono i le ao atoa ma le po*. O le uiga foi lea o upu a Paulo ina ua ia faapea ane, “*Ia nofo le afioga a Keriso i totolu ia te outou ia tele lava.*” Ilenei aso, ia matuā faapuna afioga paia a le Atua, e te taumafa ma tofo ma le fiafia i lona manogi matagofie, ma e maua le malosi faafouina faaleagaga.

“<sup>15</sup>*Ou te mafaufau lava i au feau, ma ou manatua lava ou ala.*” Sala.119

Pe afai o oe e te fiafia i le lautī a e lē o le kofe, ona sui lea o le **faapuna** i le **faamafu**. Atonu e fesoasoani ai ia te oe e faaofi lemu i le mafaufau loloto, nai lo le faa-atuatuvalaveina i le manatu e leai sou taimi po o sou agavaa e fai ai. E lē o se lu'itau faapea e fai uma pe tuu uma. A e ia fai fai malie ma faasolosolo lelei. Pe afai na o le sefulu minute e avanoa o lou taimi, ia

fa'aoga lelei ma le atoatoa minute taitasi. E te lē tau fatauina ni mataupu se sefulu o le Tusi Paia i le taimi e tasi. E leai sau su'ega e faia, po o se lipoti foi e tusi.

O afioga a le Atua e loloto ma tamaoaiga i le upu moni, e mafai ona fai tau se upu po o se fuaiupu e tasi, ona faapuna lea pe faamafu i lou mafaufau, pe lima minute pe lua itula. Aua le toe matamata i le televisé, aua le toe matamata i le telefoni e siaki meli ma ata ma tala, a e tau ina taumafa lau kofe po o le lautī, a e sei galue le Agaga Paia i totolu ia te oe, e faamatala, faalautele, faatamaoaiga Lana upu a o e faataavalevale solo i lou mafaufau. Mafaufau loloto i ai a o ave lau taavale i le galuega po o le foi i le fale, i au malologa ma koma pupuu, po o le savaliga i le taeao ma le afiafi. O nisi aso o le a e lagona pei ua e manumalo i le miliona faaleagaga; o nisi aso ua e mafanafana ua faaopoopo lou silafia o afioga paia a le Atua. O le mea taua o le fai fai so, fai fai pea. Aga'i malie mai le tasi fuaiupu i le isi, a o manatunatu loloto i ala o le Atua. Ia fai mo le tausaga atoa, ona e maua lea o au upu ma fuaiupu e 365 e te tapa i ai pe a manaomia. E te manatu o se auala sili ona lelei lea e suia ai lou olaga i se isi lelei i luga atu?

### **Tali Faa-Keriso Faaosoosoga**

- “*Ua faaosoosoina e le tiapolo i aso e fagafulu.*”
1. E malamalama lelei Iesu i o tatou faaosoosoga. “*ua faaosoosoina o ia i mea uma pei o i tatou, a ua leai se agasala ia te ia.*” *Eperu 4:15.* Ia tatou saili atu ia te Ia, na te silafia lelei o tatou laasaga, ma ia talitonu e mafai e la ona lavea'i tatou, aua ua foi mai ai o Ia, ma manumalo i faaosoosoga uma.
  2. *E oo mai faaosoosoga pe a tuana'i manumalo.* O taimi e maua lugia ai le faaleagaga, e tuu ai i lalo le tali, ua le saunia, ma lavea ai i tu'i malolosi a Satani. Fai mai le apostolo, ‘*O le manatu o loo tu o ia, ina faaeteete ina ne'i pa'u.*’. E toatele e mu ma pa'u'u i le mae'a ai o se faamoemoe i'u manuia. E pei o le au failauga o le Tala Lelei, e masani ona faaosoosoina i le loto fefete ma mitamitavale, faoa le viiga o le Atua, i le uma ai o se lauga mata'utia.
  3. *E oo mai faaosoosoga pe a vaivai.* O taimi o le vaivai i le tino, ona o le fia'ai, leai se koleni, ma'i ma aafiaga o galuega, e osofa'i ai le fili. E puaoa le mafaufau, leai se fiafia, itiiti le faamoemoe, ona tapa solo lea soo se fesoasoani e maua. Taimi tonu ia e osofa'i ai le tiapolo. Fai mai Peteru, “*Ia outou mataala, o loo fealualua'i o ia pei se leona tagi, ua saili se tasi e 'aina e ia.*” *1 Peteru 5:8.*

## **Levasa Faleselau Tuli Levasa**

**21/10/1949 - 25/11/2022 (73+1+5)**

*"Aua lava ne'i ia te i matou le Ali'i e, aua lava ne'i ia te i matou, a e o le vi'iiga ia fo'i i lau Afio, e ona le galuega o lo'o faia nei."*

O Levasa Faleselau Tuli Levasa o se tamā matua o lenei Ekalesia i Vailele. Na soifua mai i le Aso Faraile 21 o Oketopa 1949 ae na faamanava e le Atua ana feau i le soifuaga nei i le Aso Faraile 25 Novema 2022 ina ua 73 tausaga, 1 le masina ma aso e 5 lona soifua. O ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le aso 06/12/2022.

Toatele sa molimau i le tamā, ma na latou taua o se tagata faamoemoeina ma faatuatuaaina i lona tulai mai. O lea ua molimau foi sui o aiga, aemaise o fanau. Sa auga ma faataua e Levasa le soifua tautua ma ola auauna mo IESU ma lona EKALESIA, o le tamā e alofa, e onosai ma lotomaulalo, e savali i upu na te a'oa'o. E matagofie galuega na te fai. E tausa'afia, e onosai e alofa i lana fanau, ona uso ma tuafafine, ma a latou fanau, e agai iai ma faamaopoopo. E loto fesoasoani i so'o se tagata.

Sa fai e Faleselau Tuli Levasa Va le faata'ita'iga, e LĒ faalogologotiga pe solomuli pe a tele le auaunaga mana'omia. Na te lē faatigā i se finagalo o se isi tagata, a e taulamua i le faatupu o le filemu ma le nofolelei. O Levasa e tausi faifeau. E fai taulaga ma taulamua i faata'ita'iga lelei. O se tamā foi sa faamoemoeina i le ekalesia i le tele o ana galuega sa fai. Ua sola nei Levasa a e o loo soifua pea nai ona alo e faaaauau pea GALUEGA LELEI e pei ona amatalia ma pulunaunau ai le tamā a o soifua. O lona faletua ia Osalini ua maea ona faapaia lana tofi Tiakono. Tau ia o lenei – la fai pea ma viiga sili o le Atua, le ola na ia aumaia, lea ua toe mapu atu i ona aao.

Amuia oe Levasa ua e oti i le oti a le Kerisiano faamaoni ma ua e foi i lou Matai. Ia manuia lau malaga. Alofaaga mai ia te au nei faapea la tatou Aulotu. O le faatofa a le Kerisiano, e lē o le i'uga lea, e lē o le muta'aga foi - a o sa'afiasfiga ia o le mautinoa, ta te toe feiloi ma oe, i se aso o i luma. O le itula e 10.00 i le taeao, Aso 6 o Tesema 2022 sa fai ai ona toe sauniga i Vailele. Sa ta'ita'iina e le susuga ia Asotasi Time Gu(FT)le sauniga ma sa ou molimauina i le soifua galue o Levasa . O le susuga i le faiaoga Malua Dr Arthur Wulf(FS) sa ulufaleina

le sa o le tama, o le susuga ia Asotasi Time Gu(FT) sa lauga ae saunia e Ma'auga Motu(FS) ia talosaga ae sa faitau Tusi Paia le susuga ia Michael Alai(AM).O ona toe sauniga sa faataunuina lava lea i lona oliolisaga tumau i lona fanua i Vailele, ma sa ou ta'ita'iina foi lea vaega. Ona matou faamavae atu lea ia te ia i le pese masani Pese 268, 'Talofa, uso e tofaina oe.' Tofa Lefau. Tofa loa. Ia manuia lau malaga.

***Saunia: Siaosi Salesulu (FS)***

***EFKS Vailele.***

***Matagaluega VAIMAUGA***

## **FETUOLEMOANA GEORGE CAMPBELL**

**7/8/1930 - 6/5/2021 (90 + 9)**

Tina Tiakono, EFKS Frankston Pulega i Melepone i Saute, Matagaluega Vitoria, Ausetalia

Na soifua mai o ia i le Aso Tofi 7 Aokuso 1930, a e maliu filemu i le Aso Tofi 6 Me 2021, i le Falema'i i Echuca Northern Victoria. Ua 90 tausaga ma le 9 masina le soifua. O ona matua o Gale Taesali o Vaisala ma Tuputupuo-Aana o Matamatanonofo Matautu Falelatai. Na malaga i Niu Sila i le 1956. Faaipoipo ma le alii Niu Sila o George Campbell i le masina o Tesema 1959, e le Faifeau o Nokise i le Ekalesia P.I.C a'o lolotu ai. Na malaga mai ma lona aiga i Melepone Ausetalia i le Tausaga e 1969. O le tasi lenei o ulua'i aiga/pioneers o le EFKS na latou faavaeina le ulua'i Aulotu EFKS i Melepone Ausetalia i le 1985. Ua avea nei ma Matagaluega a Vitoria. Sa faaigoaina lava le Aulotu o le EFKS Melepone ma lo latou Faifeau, Susuga Urika Saifoloi F.T ma le Faletua ia Oomifaanuiualele Simanu. O le Aso 7 Aokuso, 1988 na Faavaeina aloaia ai e le Faifeau o Urika Saifoloi, le Aulotu EFKS Frankston, i le Itu i Saute o Vitoria. O le Tina foi ia Fetu ma lona aiga faatasi ma nai aiga e toa 4, na latou amataina lea Aulotu e oo mai i le asō.

**O lona soifua aoaoina ma galuega sa i ai:** Na amata mai i le a'oga a le Faifeau ma le tulaga lua i lona nuu. Faasolo atu ai i le aoga i Malifa ma Leififi Apia. O lana ulua'i galuega o le Ofisa o le Fono ma le PSC, Public Service Commission, i na ona po. Ina ua malaga mai i Niu Sila, sa faigaluega i le vaega o le Inland Revenue i Ueligitone. Ua siitia mai le aiga i Melepone Ausetalia, sa ave ana mataupu i le Monash University ma faamanuiaina ai. E fafia tele o ia e tusitusi ma ana solo (poems) ma tusi ana ata (arts),

## ***TAO'AI VAALELEI LEO TAO'AI***

***(24/6/1946 - 19/12/2022) 76+5+26***

o le isi lea ana taleni. O lana galuega sa fiafia tele i ai seia oo ina maliu, o le Interpreter po o le *Faaaliliupu i le Ofisa o Faamasinoga*, ma isi *Ofisa o le Malo*, e fesoasoani ai i tagata Samoa.

O lona soifua faale-lotu. O se Kerisiano loto mamā ma faamaoni, e loto alofa ma fesoasoani tele i soo se tagata. E faamaopoopo ma lagolago i le Galuega. O se faa-Tina faamaoni foi i le Faifeau ma lona aiga, pe a faamuli ma le fanau, a o toesea i Fono Tele i Samoa.

O ona Sauniga. (1) O lona *Funeral service sa faia i le aso 12 Me 2021*, i le Fanua maliu i Bunurong Memorial Park, Dandenong South, *o taimi lava ia o le Covid-19*, ma le Fono Tele (Zoom). O le Faifeau o le Aulotu sa taitai i lenei Sauniga puupuu, ma faai ai i lona faaliuefuefuina (cremation). O le upu o lena Aso IBRA *Filemoni 1:7 Autu "Loto Faafetai ma Tatalo"*. O le Faafetai ma le Tatalo a Paulo i le Atua, e ala atu ia Filemoni ona o le pologa o Onesemo, ma fua o lona salamō faamaoni. Ua faapologa tatou e le Faama'i oti, e tatau ai lava ona tatou salamō faamaoni e oo i lo tatou oti.

(2) *Sauniga o lona Memorial Service, Aso 17 Me 2021.* Sa faia lava i le Falesa o le Aulotu "O Aao o le Faavavau". Taitai le Faifeau o le Aulotu. Tatalo Lilomaiava Mate A.F. Molimau le fanau e toafā, ma nisi o le aiga. Upu o lo tatou faamoemoe ola i le lagi, saunia e le Aoao iu mai Malua Fagaliimaloafua I. Pesaleli. O le tusi lava o lena aso IBRA *I Ioane 2:-17 Autu "Ola i le malamalama", "Living in the light"*. O se vaega o le solo, po o le poem a Fetu na tusia a o faamuli ma le fanau, "*Bangholme (fanua o le Galuega) becomes another homely – interesting. I find myself wordless, because I could not think of an appropriate word for it. So, therefore, I think that, of all the human activities of goodness and happiness, are in one and all is God*". Sa faaii lenei Sauniga faapitoa i le luluina o lona lefulefu i le togalaau o le Falesa. O ona moomooga molipo ia te au ma lona aiga lotu. E leai se isi ona aiga sili i nuu ese nei, na i lo lana Ekalesia pele ma lona Aiga lotu i Bangholme. Talosia o avea nei o ia, o se tasi o fetu pupula o loo emoemo i le malamalama o Keriso - i le lagi. Faamanua le Atua i le Tama ma le fanau, ma o la aiga pele.

***Saunia: Iakopo Poufa Pesaleli FS  
EFKS Frankston Bangholme Melepone  
Matagaluega Vitoria Ausetalia.***

O le afioga i le alii Tiakono o le EFKS Sapapalii, le tofa ia Tao'ai Vaalelei Leo, na soifua mai le Aso Gafua 24 Iuni 1946, a e na valaaau i ai lona Matai i le Aso Gafua 19 Tesema 2022, a o saili togafiti atu i le maota gasegase i Ulumotootua. Na toe momoli mai i le aso na sosoo ai lona tino maliu i Salafai nei, ma mapu atu ai i le maota faasausau o Pa'u Sefo Pa'u i Safotulafai, e tālia ai fanau ma aiga i atunu mamao. O le 7.30 i le taeao o le Aso Toona'i 8 Ianuari 2023, na faia ai lona ulua'i sauniga pu'upu'u i le maota maliu o Pa'u, ma molimoli sa'o loa i le malumalu o Mataniu Feagaimaleata mo lona toe sauniga. O le susuga i le A'oa'o Fesoasoani, a o le afioga foi i le Fofoga Fetalai o le Maota Fono o Samoa, le susuga ia Papalii Li'o Ta'eu Masipa'u, faatasi ma le susuga i le A'oa'o Fesoasoani le afioga ia Li'o Foleni, sa latou faaulufale maia le sa o le tamā, faatasi ma le susuga ia Falefa Savea FS mo lona sauniga i le malumalu. O Tofa Li'o Foleni AF na faitauina le Tusi Paia, o Falefa Savea FS na saunia Talosaga, o le susuga Papalii Li'o Ta'eu AF na fai ma sui o le aufaigaluega ma le nuu e faia le molimau i le soifua tautua o Tao'ai Vaalelei Leo i le nuu ma le Ekalesia, a o a'u na ta'ita'i le sauniga ma faia le molimau faaleagaga, atoa ma le Upu faamafanafana mo le fanau faapea aiga.

Sa molimau le fanau, le fetalaiga ia Faae'esau Heta, Faae'esau Poasa, Sileine Tao'ai Leo, ma Otesa Leti, faatasi ma fanau a fanau, e tusa ma le latou mafutaga ma le tamā. O le susuga ia Papalii, po o le fetalaiga foi ia Tao'ai Laumaopo sa fai ma sui o uso ma tuafafine e molimau i la latou mafutaga. E manatua pea le afioga i le alii tiakono i lona auai ma faamaopoopo i soo se faamoemoe e fai a le Aulotu faapea foi i le nuu. O se auauna e galue fiafia ma le vave o le faatinoga o ona tiute. Sa ou matuā faatuatuaina lava Tao'ai Leo i soo se faamoemoe e tapena i ai le Aulotu, a o maua lona malosi ma galue ai i le Komiti o Fuafuaga fai a le Aulotu.

O le maualuga o fa'aaloaloga a le aiga na taualuga ai le aso fiafia o Tao'ai Leo, na taape ma le aufaigaluega Faifeau, faapea Lupe faalele a le aiga, tainane A'oa'o Fesoasoani ma Tiakono ma le mamalu o le Aufaipese. Ia fai pea ma viiga o le Atua lo outou ma'au fa'aaloalo. Ia manuia lau malaga Tao'ai Leo. Faamaise pea leAgaga o le Atua i le fanau, vaeane o outou suafa faapea le aiga.

***Saunia: Esera A. Esera FS  
EFKS Sapapalii,  
Matagaluega FAASALELEAGA***


**LEVASA FALESELAU TULI  
LEVASA**



**FETUOLEMOANA GEORGE  
CAMPBELL**



**TAO'AI VAALELEI LEO TAO'AI**



**POUTASI ILE SATAURO KERISO**

